

رسولان مريضان شفا دهیدی

۱۲ نیشانه یان و معجزات فراوانی جه رسولان دس، مردومان ره آشکار بوستی و ایمانداران همه تان یکدیل سلیمان ایوان میان، دور هم جمع بوستیدی. ۱۳ ولی هیچکی جز خودشان جرأت نوکودی اوشان نزدیک به، هرچند تومام مردوم، اوشان خیلی احترام قائل بوستیدی ۱۴ و مرداکان و زناکان فراوانی به خوداوند عیسی ایمان باوردیدی، ۱۵ تا اویه کی مریضان، شهر میدانان میان آوردیدی و اوشان رختخوابان و تختان سر خوسانه ییدی تا امید امرأ وختی پطرس او راه دوارستی، جه قدرت خوداوند، اقلکن اون سایه بعضی یان سر دکفه تا شفا فیگیرید. ۱۶ مردومم دسته دسته جه شهران اطراف اورشلیم اموییدی و خوشان مریضان و اوشانی کی جه ارواح پلید در عذاب بید، آوردیدی و همه تان شفا پیدا کودیدی.